

续资质通鉴长编

續貴州通志卷之四

續資治通鑑長編卷四百七十

宋 李燾 撰

哲宗

元祐七年二月丙辰詔吳泰伯廟以至德爲額先是知蘇州黃履言吳泰伯以禮義變夷之風今廟貌雖崇而名號未正故有是詔 詔商賈許往外蕃不得輒帶書物送中國官

丁巳詔溫國長公主下降日皇太妃送至第外命婦免從 占城國首領表言應大朝討蕩交趾乞率兵協力掩襲時以占城交趾有舊怨交趾見今入貢不絕臣節難議興師令學士院候將來降占城國敕書依此回答 殿中侍御史楊畏言臣竊聞以左朝議大夫魏廣爲

徐王府侍講除命既傳人言未協訪聞廣齒髮雖高行治不著碌碌無可言者或謂其稍擅辭藻而每有投獻以干貴位審如是其無老成自重之風可見朝廷方欲謹選厚德而近時由王府官者又多進拔如廣常才遂爲此官搢紳之論所以爲未協也伏望別選清望重德之士以輔賢王右正言姚勔言竊以王府侍講宜用經術文學履行修潔之人以充其選今廣人材猥下學問空疎但以自來浪游市廛熟諳邪徑慣習里巷羣小之事既無行誼可稱亦無經術可取所爲凡惡豈堪勸講之官伏望特寢成命以協公論廣尋改軍器少監

器少監在三月十八日今并書之

己未禮部郎中葉祖洽知海州先是右正言姚勔再劾

奏祖洽而御史亦言祖洽貪鄙無狀淫縱悍妻薄于事

父不可令汙省闈故也

舊錄云御史言祖洽貪鄙凡下

是命按元祐密疏右正言姚勔言祖洽兩章其一乃六年十二月三日其二乃七年正月十二日敘祖洽貪鄙無狀不持廉節厚于妻妾薄于事親等節目極詳但辭多猥俗不足具載卻不見御史姓名今別修如上

詔沿邊諸路遇差總管統制軍馬出入許依例以走馬

承受使臣一員從軍

樞密院言諸路探報多不實緣

賞輕無以激勸欲令陝西河東經略司各以本司封樁

或軍資賞錢物給充探事支用其沿邊州城堡寨將副

舊得支用者亦約數均給若探報有功或報不以實並

量事輕重隨宜賞罰事理極重合從朝廷賞罰者奏聽

指揮從之

刑部言兩犯賊罪杖各經勒停若與一犯

人同期敘用輕重未稱欲令兩犯正入已賊罪杖並經

勒停于初敘用期限上展二期敘用武臣準此犯在今
來展期已前者聽依舊法從之

庚申權陝西轉運使李南公言銅錢鐵錢界首輕重不
同欲乞以興州銅商號州黑錫運至陝州鑄錢監每年
鑄錢且以二萬貫爲額應副陝州及陝右兩驛支遣及
換易鐵錢使用兼銷減得商號州積下黑錫從之

辛酉太府少卿秘閣校理王古爲秘書少監少府監晏
知正知潁州右中散大夫陳紘爲少府監左中散大夫
程嗣恭爲太府少卿左朝議大夫李之紀爲屯田郎中
左朝請大夫劉淑爲祠部郎中 先是環慶路經略使

章棻奏準元祐七年正月三十日樞密院劄子章棻奏
檢會樞密院元祐六年十二月二十四日降下劄子付

逐路帥臣處置邊防機要畫一事件數內有與臣到本
路後行下約束條目大意雖同而其間措置小異合具
奏稟臣竊謂西賊狡獪未敢專執施行伏乞朝廷詳酌
指揮樞密院勘會昨降下御前劄子大概令諸路遇賊
併兵入寇堅壁清野俟賊氣惰覓便掩擊今來所奏本
路已行約束事件除係隨機應變自繫帥臣處畫施行
外看詳西賊既舉大兵入寇卽本地分漢兵自是眾寡
不敵若令將寨官分領人馬據險觀望竊慮西賊探知
底裏先遣輕兵散行持劫誘致官軍向前接戰別發重
兵併力拒敵或扼截元駐兵高險歸路萬一官軍勢力
不加又節制不得入城未審令出戰兵馬如何退避或
相持累日賊勢未散不悉兵食如何廩給如此是與不

是堅壁之計兼一路帥府去邊面地里各有遠近若放
令賊兵粘綴直至帥府城下會合重兵則恐將官使臣
等承此節制之後遇賊入寇觀望避事不肯向前惟務
退卻至帥府會合不惟被寇地分闕人出戰兼使近裏
籬落必遭殘害又有去帥府相遠地分將副可與不可
亦令至帥府會合劄付臣更切詳審前項事理從長講
說十全利便措置施行仍具已施行事將入急遞以聞
于是秦復奏臣契勘近準朝旨十月十八日詔當考準擬西人恐
大舉併兵前來作過但能堅壁清野保守城寨無虞已
爲全勝臣竊謂往年賊犯鎮戎軍及去年侵略河外非
不堅壁清野而民被塗炭不少此已然之事兼熙甯年
西賊侵犯慶州攻圍沿邊九處城寨是時兵將束在城

寨勢不能出致賊分遣輕騎入近裏剽略更無忌憚竊
恐今日以後兵將旣堅壁居內盡遭圍閉無由得出外
復有長驅深入之患臣遂申請上件事理况本路並邊
一帶山谷深阻最得勝勢今簡閱諸將次等兵馬分擘
在諸鎮城寨充守禦將精銳人馬出戰差定將官統領
如遇西賊入寇卽將出戰將官帶領人馬出城亦不使
便當賊鋒令逐將與使臣蕃官分領人馬擇利駐劄高
險遠望卽不聚一處賊馬追逐又令引避使賊知官軍
戰兵在外豈不慮山險之處各有伏兵欲攻城則畏腹
背之患欲鈔略則官軍隨其所向出奇設伏覓便稍擊
何由敢散行打劫欲戰則或引避或據險而不與之爭
鋒何由得誘致扼截此蓋正慮賊以大兵入寇眾寡不

敵所以須合令戰兵分布在外使彼深入吾地戰則不能攻則不敢鈔掠則無獲不過三兩日自當引去緣出戰人馬所齎乾糧自可以支十日就使未退我爲主彼爲客我軍旣在村野固不憂食彼合則諸將之兵得以伺隙而擊其虛彼分則險要地利莫非官軍先據可以坐待其老大抵戰兵在外則守兵乃敢堅壁如外無戰兵而但務堅壁則長驅深入一路均被其患臣之所慮正以爲近裏籬落計也且將官在城寨中有畏懦之人則可託以遭圍閉不出兵觀望避事若其在外雖怯懦之人無以爲辭况今所差出戰將官並是選閱膽略可委之人其所以令抽那退避直至帥府與重兵會合止謂萬一有須至如此令相度事勢而爲之非謂一槩並

合如此兼被寇地分眾寡不敵雖將兵在城豈暇出戰
况本路環慶州沿邊近裏城寨共約三十餘處假令賊
舉國併力入寇本路度賊勁兵不過二十萬眾分兵盡
圍城寨則大小相除每城寨不滿萬人官軍旣在外而
賊兵每處雖滿萬人豈敢公然深入甯不慮官軍躡其
後若不敢盡圍則諸將之兵自可互相應援賊旣見官
軍散布要害自不敢深入就使賊敢深入正墮我計中
據險邀擊絕其歸路可以鑿殺使無噍類彼旣腹背不
支自當殲潰何暇更肆剽略豈非十全利便今準前項
朝旨緣此止是約束將官大略其餘纖悉臨機措置臣
見更從長講議施行次黃貼言堅壁清野蓋自古良將
禦戎之策然不可以只循一軌使賊知我無通變之路

反爲賊所制伏見元祐二年內鎮戎軍遭圍閉十一將
兵盡在城內蕃眾擄掠三百里以上如行無人之境所
幸者賊不相知虛實若更深入擄劫則害尤大蓋官兵
盡在城內無以制之及其將去也于所劄寨內如常日
燒起煙火量以兵圍守一夕而遁城中比知賊退已是
第二日出兵前去追襲不見一人一騎此專用堅壁而
外無兵將已試之驗去年九月內犯河外大率不異于
此又慶州係帥臣所治今契勘慶州見管土軍客軍六
千餘人又差在諸縣巡檢下并在城窠坐諸官員當直
盡在六千人數內邠甯耀州下番人兵共四千人若除
留逐州及將東兵緩急別添與沿邊城寨充守禦外不
滿五六千人共屯在近裏籬落豈不慮西賊長驅深入

之患若只用慶州所屯兵馬可以差出不過三四千人
豈能捍禦西賊所以令沿邊將分抽摘下出戰人馬以
漸退避與帥府人馬會合應援聊以張大聲勢爾若按
事勢須帥府屯宿重兵方能表裏相應所以累奏乞添
一兩將軍馬至今未蒙朝廷施行狀乞照會又如遇西
賊大舉入寇雖將沿邊部族人口及將兵盡行收入城
寨止是邊寨爲堅壁清野之計况近裏三二百里之內
居民甚密若預行起遣則必須勞擾驚疑若不起遣又
緣近裏更無重兵應援所以將沿邊兵將分布出戰守
禦假如一寨有兵萬人最患者無外人照望不知賊兵
進退就使賊兵引退亦須詳審探望方敢出兵又城內
之兵據其城門只可並行人馬拽兵萬人須及半日以

上方可齊集前去追襲賊兵過界遠矣豈能害賊又勘
會熙甯三年內西賊侵犯本路攻圍城寨亦如元祐二

年入寇鎮戎軍之比

七年二月八日奏此
今附本月日要當刪修

壬戌樞密院言熙河路遇西賊于別路入寇本路合出
兵牽制緣蘭州限隔大河緩急濟渡有無船棧曾與不
曾豫計置以備緩急欲下本路經略司勘會如別無準
備卽疾速計置從之

甲子成都府路轉運司言簡州進士鄧宗古閬里稱孝
親歿負土累墳甘露頻降生事死葬始終一節乞賜獎
諭詔賜絹二十匹 詔武臣丁憂者見任管軍處或充
路分總管鈐轄都監知州縣城關使縣尉都監寨主監
押同巡檢巡檢駐泊巡防駐泊及管押綱運大使臣係

軍班換授小使臣非蔭補并武舉入官者及差使借差並不解官內係緣邊任使并押綱者給假十五日餘一百日其應不解官而願解官行服者除緣邊任使奏候朝旨外聽之

乙丑詔編修樞密院條例官就編經武要略初熙甯中樞密使文彥博等言請置局編修經武要略自國初至熙甯四年功未畢而罷至是復命官編修俾終其事

詔今後府界諸縣手力本等合差戶空閑不及三年者以助役錢募人充應依本役年限候滿日有空閑及三年人戶卽行差罷制置發運司言兩浙路每年合發額斛各準朝旨將五千萬石折納見錢並令收買金銀紬絹起發候至年終收買支錢不盡卽據剩錢起發上

京欲乞應有椿下折斛錢並不得別作借兌支使從之
丙寅溫國長公主進封曹國長公主 陝西河東六路
經略司各賜錢五十萬貫

政目十四
日事當考

丁卯權陝西轉運使李南公除直祕閣 引進使嘉州

防禦使權樞密院副都承旨李綬爲隰州防禦使罷副
都承旨以忠州團練使曹誦代之 步軍都虞候信州

團練使定州路副都總管劉斌權同管勾馬軍司先是
樞密院以步軍副都指揮使劉舜卿卒環衛闕人欲進
補先奏知太皇太后曰更有闕皆多時不補亦不妨否
將相非小事豈得容易王巖叟言祖宗以來三帥不曾
闕兩人蓋殿帥若闕難爲從下便超補今姚麟是殿前
都虞候合陞作步軍副都指揮使又劉斌本以不才令

出今不得已卻欲召入令與麟相兼管從之太皇太后
又言管軍須是有邊功眾人所服方可巖叟對曰臣等
所遷卽此等人陛下如此重名器甚善然合用者亦須
迺邇進之令就近緩急方得使若大段疏遠亦難應用
太皇太后曰須要擇人對曰非敢超躐亦止欲循次稍
進耳 詔官軍出寨募能發掘西賊窖穀將官驗受分

給人馬充食糧每斗支錢一百五十文足馬料每斗支
錢一百文足並給係省錢 樞密院言勘會陝西緣邊

見各有緊切控扼賊馬道路以自來夏國講和未曾修
建堡寨今旣絕彼貢奉可以乘時踏逐地基修築奉聖
旨令詔陝西河東諸路經略司疾速選官帶領合用人
馬親詣漢界及並漢地生界內選擇形勢要害堪作守